

摘藻堂四庫全書薈要

史部

欽定四庫全書薈要

史部

文獻通考卷二百五十七

六

詳校官員外郎臣潘紹觀



欽定四庫全書薈要卷九千五百七十七

史部

文獻通考卷二百五十六

鄱陽馬端臨貴與著

帝系考七

后妃

梁太祖元貞皇后張氏單州碭山人太祖少聘之生末  
帝太祖貴封魏國夫人天祐元年卒太祖即位追冊為  
賢妃末帝立追諡后

昭儀陳氏宋州人少以色進後專寵開平三年度為尼  
昭容李氏亦以色進拜昭容後不知所終

末帝德妃張氏父歸霸事太祖為梁功臣帝為王時以  
婦聘之帝即位將冊德妃立為后未及而卒

末帝次妃郭氏父登州刺史歸厚少以色進梁亡為尼  
後唐太祖正室劉氏代北人太祖為晉王時封秦國夫  
人莊宗即位尊為皇太妃

次妃曹氏太原人先封晉國夫人生莊宗莊宗即位尊

為皇太后薨葬魏縣諡貞簡

莊宗神閔敬皇后劉氏魏州安成人晉王攻魏裨將袁建豐掠得之納之晉宮莊宗嗣位太后以賜之有寵生子繼岌帝即位將立后而衛國夫人韓氏正室也燕國夫人伊氏次妃位在劉氏上故難其事宰相豆盧革樞使郭崇韜等希旨請立劉氏為皇后上從之乃封韓氏為淑妃伊氏為德妃莊宗遇弒后出奔明宗即位遣人賜后死韓淑妃伊德妃皆居太原晉高祖反時為契丹

所虜

自唐末喪亂后妃之制不備至莊宗時後宮之數尤多有昭容昭儀昭媛出使御正傳真懿才咸一瑤芳懿德宣等其餘名號不可勝紀明帝以後又有司寶司贊司膳司醞司飾司衣過藥梳篋衣服知客寶省書省弟子院使等名皆封國夫人或郡夫人少者縣君

前代內職無封君之禮此一時之制

明宗和武憲皇后曹氏不知所出天成元年封淑妃後

立為皇后愍帝即位尊為皇太后

明宗昭懿皇后夏氏不知其所出生秦王從榮及愍帝  
帝未即位前卒天成時追冊為皇后

明宗淑妃王氏邠州餅家子初為梁將劉鄩侍兒鄩卒  
帝納之即位封為淑妃愍帝即位尊為皇太妃

愍帝哀皇后孔氏父循愍帝即位將立為皇后未及而  
難作帝出奔廢帝入與所生四子皆見殺晉高祖立追  
諡曰哀

廢帝皇后劉氏父茂威應州渾元人初封沛國夫人帝即位為皇后石敬瑭犯京師與帝俱自焚死

晉高祖皇后李氏唐明宗女初號永寧公主天福二年有司請立皇后帝以宗廟未立謙抑未遑帝崩出帝即位乃尊為皇太后

安太妃代北人不知其世家生出帝帝立尊為皇太妃出帝皇后馮氏定州人父濛初適高祖弟重允重允卒出帝納之立為皇后契丹入京師從帝北遷不知所終



漢高祖皇后李氏晉陽人本農家女高祖少為軍卒入其家劫取之高祖貴封魏國夫人生隱帝高祖即位立為皇后隱帝即位為皇太后

周太祖聖穆皇后柴氏邢州堯山人太祖少娶之太祖即位已卒追冊為皇后

太祖淑妃楊氏鎮州真定人初為趙王鎔妾鎔死嫁石光輔光輔卒太祖聘為繼室天福中卒即位追冊為妃貴妃張氏鎮州真定人初為武氏婦武卒太祖納之太

祖兵入京妃為劉銖所殺即位追冊

德妃董氏鎮州靈壽人初為劉進超妻進超沒太祖聘之即位冊為德妃

世宗貞惠皇后劉氏不知所出帝微時所娶封縣君太祖舉兵留京師為漢人所殺太祖即位封彭城郡夫人世宗即位追冊為皇后

宣懿皇后符氏彥卿之女初適李崇訓崇訓反誅帝納為夫人即位立為皇后顯德時崩

皇后符氏宣懿后之妹宣懿后崩帝納之恭帝立尊為  
皇太后

宋太祖皇帝始因五代之制置司簿掌宮中簿書出納  
之事又置司賓並封縣君又置樂使主宮中聲伎並賜  
帟帔太宗置尚宮太監及知內省充內宣徽南院使兼  
承旨并司簿或封國夫人郡夫人又置寶省尚食封縣  
君又置司寶司儀司給或授郡君縣君又樂使之下增  
置副使又改內省為尚書內省令尚宮太監並號尚書

司給司簿同掌宮籍及司出給改祗候人為御侍衣服  
為司衣梳篋為司飾枕被為司寢湯藥為司藥樂使為  
仙韶使副使為仙韶副使弟子呼供奉又置直筆書省  
主事改茶器為翰林局掌御閣為直閣掌宮門為直門  
掌燈火為掌燈掌從物為直仗針線院為裁縫院又令  
司簿兼掌寶司言兼監班司儀兼承宣掌寶司儀及仙  
韶使副使仍封縣君又司記知尚書內省公事而皆賜  
以帟帔真宗置淑容順容婉儀婉容並從一品在昭儀

上又置貴儀在淑容之上又置司宮令正四品在尚宮之上

太祖孝惠皇后賀氏開封人太祖正妃初封會稽郡夫人顯德五年崩建隆三年追冊為皇后

孝明皇后王氏邠州新平人太祖繼妃建隆元年八月立為皇后乾德元年崩

孝章皇后宋氏河南洛陽人乾德六年納為皇后太宗即位號開寶皇后居西宮至道元年崩

太宗淑德皇后尹氏相州鄴人太宗正妃早崩太平興國元年追冊為皇后

懿德皇后符氏陳州宛丘人太宗繼妃帝為晉王封越國夫人開寶八年崩太平興國元年追冊為皇后

元德皇后李氏真定人初為太宗後宮封夫人生真宗太平興國二年崩真宗即位追尊為皇太后

明德皇后李氏潞州上黨人太宗妃雍熙元年立為皇后真宗立尊為皇太后

貴妃孫氏開封人 昭容吳氏錢塘人 尚宮李氏徐

氏 順容邵氏揚州人俱太宗後宮

朱貴妃太宗後宮為才人後入道明道中卒

秦國夫人劉氏真宗乳母始封齊國夫人真宗即位封  
秦國延壽保聖夫人咸平元年薨帝以乳保之恩事之  
如母舉哀制服

真宗莊懷皇后潘氏大名人真宗元妃端拱二年崩至  
道三年追冊為皇后

莊穆皇后郭氏太原人真宗繼妃帝繼位立為皇后景德四年崩

章獻明肅皇后劉氏益州人景德初為美人進德妃莊穆后崩立為皇后仁宗即位尊為皇太后

章懿皇后李氏杭州人入宮為司寢生仁宗進位婉儀明道元年進宸妃薨章獻既崩追尊為皇太后

章惠皇后楊氏益州郫人初為才人進婉儀仁宗在乳祿有護視功帝即位進皇太妃章獻崩遺詔以為皇太



后

杜貴妃真宗後宮後入道

國初立后妃皆不行冊禮大中祥符七年封婉儀楊氏為淑妃翰林草制付中書不宣於外庭乾興元年遺制尊皇后為皇太后淑妃為皇太妃亦不果行冊禮自雍熙後后妃皆寫誥身用金華羅紙金塗標袋有司進入近臣牧伯皇親皆修貢禮為賀

仁宗廢后郭氏其先應州金城人天聖中冊為皇后立

九年以後宮嬖寵愈爭坐廢出居瑤華宮號金庭教主  
冲靜仙師又二年暴薨追冊為皇后

嘉祐中帝欲置影殿於洪福寺禮官因請祔廟下兩  
制議未定而知制誥劉敞言春秋之義不薨於寢不  
赴同姓不反哭於廟則不言夫人不稱小君徒以禮  
不足故名號闕然然則名號與禮非同物也名號存  
而禮不足因不正其稱况敢正其議乎郭后於三者  
無一焉而欲正其禮恐未安於義也傳曰不有廢也

君何以興廢興之間固必有正與不正之理存焉今  
欲扶所廢以為正亦將抑所興以為不正歟古者不  
二嫡則萬世之後宗廟之禮豈臣子所當擅輕重哉  
議者或謂郭氏之追命也既復其號不得不異其禮  
譬之大臣坐非辜之貶者苟明其非辜則復用之豈  
得不遂使為大臣乎臣謂物有殊類而異勢未可以  
相準臣之與妻其義雖均然逐臣可以復歸放妻不  
可復合臣衆而妻一也禮官張洞言郭后之沒不得

其所責當歸於朝廷死者何罪豈有始儷宸極終不  
廟食邪議者欲用後漢東晉故事或祭於陵寢或築  
宮於外稽之二史皆曰母后亦未見其合也惟唐立  
別廟遇禘祫則享之於義為允敞又言郭后所以然  
者蓋於時聖慮在宗廟社稷之際也昔漢光武以后  
郭氏怨懟廢之然當時群臣不以光武為情有厚薄  
亦不以郭氏為不當廢者其意識遠也今陛下之慮  
豈不然乎光武雖廢郭氏然顧待其家不衰亦明退

人以義不緣於私也此又詔書所以追復郭氏之意  
矣用平生之眷故尊以虛名顧禮義之正故絕其祔  
廟是范曄所謂使後世不見有隆薄進退之隙者也  
今洞之意以追復郭后則出於天子以停止廟諡則  
出於大臣共一詔書也而論之異同未知洞何從見  
之若不幸此言傳於後而且歸過君父虧損聖德此  
其一也臣前奏以為廢興不兩立人君不二嫡使萬  
世之後禮分不明洞不以此為辯若不幸朝廷過聽

之是雖自以能許上起廢為功而且陰福母后妄瀆禮正此其二也故臣以謂非臣子之義忠信之道矣其後議卒不上朝廷亦未遑有所行也

按郭后正位宮闈者九年其廢也坐與後宮爭寵非如前代若霍若賈之徒有不可恕之大罪也是以當時范文正公輩力爭之以為過舉失德既而昭陵悔悼追復位號蓋賢於漢之景武唐之高宗玄宗矣既復位號則享祀乃禮之正而劉原甫力

爭之夫古人所謂並后二嫡者但謂不當使妾上  
僭耳如后既廢而復則固后也又已歿則不嫌其  
為先后也何二嫡之有且當時曹后在位而溫成  
以宮嬪專寵及其歿也追冊皇后置立園廟乃其  
失禮之尤大者原甫不彼之正而此之泥何邪

慈聖光獻皇后曹氏真定人景祐元年冊為皇后英宗  
即位尊為皇太后

景祐元年九月立皇后曹氏冬至行冊禮與通禮異

不立仗不設縣前一日守宮設次於朝堂冊寶使副  
次於內東門命婦次於受冊寶殿門外設皇后受冊  
寶位於殿庭階下北向奉禮設冊寶使位於內東門  
外副使內侍位於其南差退東向北上冊寶案位於  
使前南向又設內給事位於北廂南向其日百官常  
服早入次禮官通事舍人先引中書令侍中門下侍  
郎中書侍郎及捧冊寶官執事人絳衣介幘詣垂拱  
殿門就次以俟冊降禮官通事舍人分引宰臣樞密



冊寶使副百官入文德殿庭立班東西相向北上內侍二員自內承旨降冊寶率執事者捧冊寶出垂拱殿捧冊寶官俱搢笏率執事人禮官導中書侍郎押冊中書令後從門下侍郎押寶侍中後從援衛如儀由東上閣門出至文德殿庭權置禮官通事舍人引使副就承制位次引侍中於使前西向稱有制典儀曰再拜贊者承傳使副在位官皆再拜宣曰贈尚書令冀王曹彬孫女冊為皇后命公等持節展禮使副

再拜侍中還位門下侍郎持節帥主節使詣東北主  
節以節授門下侍郎門下侍郎執節授冊使冊使跪  
受興付主節幡隨節立於使左次引中書令侍中詣  
冊寶東北西向立中書侍郎引冊案立於中書令之  
右中書令取冊授冊寶使使跪受興置於案中書令  
侍郎退復本班又門下侍郎引寶案於侍中之右侍  
中跪取寶以授冊寶使使跪受興置於案侍中門下  
侍郎退復本位典儀再拜如前禮官通事舍人引使

副押寶持節者前導捧冊寶官捧舁援衛以次出朝堂由右昇龍門入大慶殿門由殿西過宣祐門詣內東門內臣引內外命婦俱入就位立內侍詣閣奏請皇后首飾褱衣冊寶至內東門外位使副東向立內給事進就南向位禮官通事舍人引使就內給事前面向北向跪稱冊寶使李迪副使王隨奉制授皇后冊寶訖內給事入詣受冊寶殿閣皇后前跪奏內侍進詣使前面西跪受冊寶以授內謁者監使退復位內

謁者監主當內臣持冊寶入內東門內侍從之以次入詣殿庭內侍贊引皇后降立庭中北向位內侍跪取冊又內侍跪取寶興進立於皇后之右少前西向內侍二員進立於皇后之左少前東向又內侍稱有制內侍贊皇后再拜內侍奉冊進授皇后皇后以授內侍內侍又奉寶亦然復贊再拜前導皇后升座南向內臣引內外命婦稱賀如常儀內侍進詣皇后前跪奏禮畢內侍前導皇后降座還閣內外命婦班退

少頃皇后常服謝皇帝皇太后用常禮百官東上閣  
門拜表稱賀其冊如皇太子用珉玉五十簡標首在  
內匣隨冊之長寶用金方一寸五分高一寸文曰皇  
后之寶盤螭紐綬并沿冊寶法物約舊制為之匣綠  
朱漆金塗銀裝 冊文曰皇帝若曰天地定位陰陽  
相成人道貫之以綱大倫后德配之以熙內治聖人  
有以端其本也故造舟之迎言乎備詩人有以美其  
化也故周南之風著乎始粵朕冲昧祗若丕構深惟

承荷之重輔佐攸艱用簡納賢明協於人神之望咨  
爾贈尚書令冀王配饗太祖廟庭曹彬孫女惟乃祖  
克有武功勤勞王家保勲不伐享厥終慶教流後昆  
薰然慈和善祥憑積生此邦媛其漸漬醇醲發聞馨  
香所從來遠矣起居祖習不待姆師之訓風容矩度  
自為宗黨之憲長秋曠位陰教未序咨求訓範統正  
六列宗公鼎臣誦言於朝願即嘉時聿申典禮朕以  
春秋之義必娶大國摯疇之家乃稱福耦謀及秦箴

聘以穀主惟吉之從有命既集今遣使工部尚書同  
平章事李迪副使戶部侍郎參知政事王隨持節冊  
命爾為皇后欽哉夫惟肅恭可以事上夫惟謙裕可  
以接下泰而能約則驕弗至動而慎思則悔弗萌懋  
乃后德修乃嬪職奉承宗廟儀刑家國永綏無疆之  
祚不其韙歟

皇后張氏與郭氏同入宮進美人天聖六年卒明道二  
年追贈皇后

溫成皇后張氏河南永安人入宮為才人慶歷八年進位貴妃行冊禮如后儀至和元年薨追諡為皇后

慶歷八年制封美人張氏為貴妃所司擇日備禮冊命學士宋祁就院寫告用官告院印封進妃擲告於地不受十二月發冊設次位命官持節授冊印內外命婦稱賀及入謝畧如冊皇后儀冊用竹簡二十四枚長尺一濶寸天下樂錦裝標金印方寸文曰貴妃之印龜紐紫綬



董淑妃仁宗後宮拜婕妤嘉祐七年薨

美人尚氏楊氏仁宗後宮與郭氏忿爭后既廢尚氏入洞真宮為道士楊氏出居別宅

美人朱氏仁宗後宮

貴妃周氏仁宗後宮徽宗時薨

德妃楊氏仁宗後宮神宗時薨

賢妃馮氏仁宗後宮徽宗時薨

英宗宣仁聖烈皇后高氏亳州蒙城人英宗元妃帝即

卷一百一十五  
位冊為皇后神宗立尊為皇太后

張修容英宗後宮初拜昌平郡君進封修容建炎四年薨於虔州

神宗欽聖憲肅皇后向氏河內人神宗元妃帝即位冊為皇后哲宗立尊為皇太后

欽成皇后朱氏開封人熙寧初入宮為才人生哲宗帝即位尊為皇太妃

欽慈皇后陳氏開封人入宮生徽宗封才人神宗上仙

才人未幾而薨建中靖國初追冊為皇太后

賢妃林氏神宗後宮元祐五年薨

賢妃武氏神宗後宮大觀元年薨

哲宗昭慈聖獻皇后孟氏洛州人帝即位冊為皇后紹

聖三年坐廢居瑤華宮號華陽教主玉清妙靜仙師帝

既崩欽聖詔后還內號元祐皇后崇寧初再廢居瑤華

宮靖康時淵聖議復后位號詔未下而京城陷張邦昌

僭位上尊號曰宋太后迎入宮受百官朝垂簾聽政

元祐五年八月太皇太后詔以皇帝納后有期令太常禮官檢詳古今六禮沿革參考通禮典故具其節文著為成式者先是太皇太后諭宰臣呂大防等曰皇帝將納后天聖景祐故事止降進冊未嘗御殿禮甚簡略大防等請退而討論遂降是詔 又詔翰林學士御史中丞兩省給舍與禮部太常寺官同詳議六年八月三省樞密院言納后六禮命使納采問名納吉納成告期差執政官攝太尉充使侍從官或判

宗正官攝宗正卿充副使以舊尚書省權為皇后行  
第納采問名同日次日納吉納成告期納成加穀圭  
請期依開寶禮改為告期納采前擇日告天地發冊  
命使差宰相攝太尉執政官攝司徒前一日告宗廟  
奉迎命使依開寶通禮改六禮親迎為命使奉迎差  
宰臣攝太尉執政官攝司徒皇帝臨軒與冊禮使副  
同日遣先遣冊禮使次遣奉迎使令文武百官詣行  
第班迎其日皇后服祿衣乘重翟車鹵簿依禮令由

宣德門東偏門入文臣大卿監武臣正任刺史以上  
宣德門外班迎詔從之初議以都亭驛為皇后行第  
給事中范祖禹言都亭驛常為遼使館舍今納皇后  
以母天下而使居夷狄之館非所以觀示四方為正  
始之道也請以舊尚書省為行第從之祖禹又言臨  
軒發冊命使奉迎及皇后入內皇帝皆服通天冠絳  
紗袍於禮未隆請並服袞冕以重大昏之禮翰林學  
士范百祿言昏禮下達匪媒不克今采擇先定有命

既集而形於麻制以后氏族姓宣告外廷方且遣使  
齎制行納采問名之禮則禮文顛倒失先後之序請  
以降詔之日行納采問名之禮宣制之日行納吉納  
成告期之禮皆不從既而禮部太常寺言五禮命使  
據開元納采問名合用一使其納吉納成告期各別  
日遣使今未委三禮共遣一使或各遣使文武百官  
詣行第班迎文臣大卿監武臣正任刺史以上宣德  
門外班迎緣至日行第門外已設皇后車乘儀仗逼

隘不容百官車馬其文武百官欲並於宣德門外立班奉迎按士昏禮用鴈所以為贄也又按曲禮凡贄天子鬯鄭康成謂天子無客禮以鬯為贄者惟用告神今已據周禮用穀圭聘后欲更不用鴈文德殿發制欲依發冊例立仗或止用月朔視朝仗百官朝服制書登車訖欲出宣德正門使副步從至外上車使者復命欲入左掖門於門外下車詣內東門付內侍進入制版匣欲倣穀圭匣製造使副受制書奉出朝



堂門外置制書於車內緣右昇龍門臺不通車乘過  
往今參詳置制書車合入宣德門東偏門至右昇龍  
門外候使副奉出制書即置車內詔納吉納成告期  
令各遣使文德殿發制依發冊例立仗餘並從之

七年正月詔尚書左丞蘓頌撰皇后冊文兼書二月  
學士院上六禮辭語納采制文太皇太后曰咨某官  
封姓名渾元資始肇經人倫爰及夫婦以奉天地宗  
廟社稷謀於公卿咸以為宜率由舊典今遣使持節

太尉某宗正卿某以禮納采答文曰太皇太后嘉命  
訪昏陋族備數采擇臣之女姑姊妹即云先臣某官  
之遺女未閑教訓衣履若而人欽承舊章肅奉典制  
某官封糞土臣姓某稽首再拜承制詔問名制文太  
皇太后曰咨某官封姓名兩儀合德萬物之統以聽  
內治必咨令族重宣舊典今遣使持節太尉封某宗  
正卿封某以禮問名答文曰太皇太后嘉命使者重  
宣中制問臣名族臣女夫婦所生先臣故某官之遺

微孫先臣故某官之遺曾孫先臣故某官之遺孫先  
臣故某官之外孫女年若干欽承舊章肅奉典制某  
官冀土臣某稽首頓首再拜承制詔若女祖以上在  
直云某官臣之孫女納吉制文太皇太后曰咨某官  
封姓名人謀龜從同符元吉恭順典禮今遣使持節  
太尉封臣某宗正卿封臣某以禮納吉答文曰太皇  
太后嘉命使者某重宣中制臣陋族卑鄙憂懼不堪  
欽承舊章肅奉典制某官冀土臣姓名稽首頓首再

拜承制詔納成制文太皇太后曰咨某官姓名之女

孝友恭儉實維母儀宜奉宗廟永承天祚以黜纁黻

圭六馬以章典禮今遣使持節太尉封某宗正卿封

某以禮納成答文曰太皇太后嘉命使者某重宣中

制降婚卑陋崇以上公寵以豐禮脩物典冊欽承舊

章肅奉典制某官冀土臣姓名稽首頓首再拜承制

詔告期制文太皇太后曰咨某官姓名謀於公卿大

筮元龜固有不臧吉日維某月某甲子可迎率遵典

禮今使使持節太尉封某宗正卿封某以禮告期答  
文曰太皇太后嘉命使者某重宣中制以某月某甲  
子吉日告期臣欽承舊章肅奉典制某官糞土臣姓  
名稽首頓首再拜承制詔命使奉迎制文太皇太后  
曰咨某官姓名禮之大體欽順重正其期維吉典圖  
是若今遣使持節太尉封某宗正卿封某以禮奉迎  
答文曰太皇太后嘉命使者某重宣中詔令曰吉辰  
備禮以迎螻蟻之族猥承大禮憂懼戰悸欽承舊章

肅奉典制某官冀土臣姓某稽首頓首再拜承制詔  
按晉穆帝永和十年臺符問六禮版文舊稱皇帝今  
太后臨朝當何稱博士曹耽云公羊傳婚禮不稱主  
人母諸父為主太常王彪之云三傳異議不可全據  
今太皇太后臨朝稱制文告所達國之大典皆仰稟  
成非無外事也豈婚聘獨不通乎六禮版文應稱皇  
太后今請遵彪之議詔並從之 三月禮部太常寺  
上納后儀注發六禮制書日太皇太后御崇慶殿坐

命内外命婦立班行禮畢内給事出殿門置六禮制書案上出内東門禮直官通事舍人引由宣祐門至文德殿後門入權置案於東上閣門命使納采問名文德殿宰臣親王執政官宗室文武百僚大小使臣軍員蕃官易朝服樂備而不作立班定内給事奉制書案置於橫街北稍東西向北上禮直官通事舍人引門下中書侍郎次引使副就橫街南承制位北向東上内給事詣使者東北立稱太皇太后有制典儀

曰再拜在位官皆再拜宣制曰皇帝納后命公等持節行禮宣訖典儀曰再拜使副皆再拜授制書訖典儀曰再拜在位官皆再拜禮直官通事舍人太常博士引使副從制案出由端禮門入右昇龍門安於油絡網犢車內出宣德門鼓吹備而不作至皇后行第大門外令史二人對捧制案立主人於大門內儼者立於主人之左北面進受命出曰敢請事使者曰某奉制納采儼者入告主人曰某之女若而人既蒙制



訪臣某不敢辭儼者出告入引主人出於大門外再拜使者先入使者曰太皇太后有制主人再拜宣制書畢主人再拜受訖主人進表訖再拜使者出問名同上儀使者曰將加卜筮奉制問名主人曰臣某之女若而人既蒙制問臣不敢辭命使納吉納成告期並同命使納采問名儀納吉使者曰加請卜筮占曰從制使某納吉主人曰臣某之女若而人龜筮云吉臣預有焉臣某謹奉典制告期使者曰某奉制告期

主人曰臣某謹奉典制以上納吉納成告期請見受制接表並如納采儀臨軒命使冊后及奉迎文德殿宰臣親王執政官宗室文武百僚朝堂易朝服皇帝常服乘輦至文德殿後閣侍中奏中嚴次外辦皇帝服通天冠絳紗袍出閣乘輦皇帝出自西房降輦即御座分引兩省官及待制權侍郎觀察使以上分東西入殿門各就位東西相向立奉寶置於御座前奉宣后冊出閣由東上閣門出至文德殿庭橫行典儀

贊曰拜在位官皆再拜使副授冊宣制曰冊某氏為  
皇后命公等持節展禮宣訖典儀曰再拜使副皆再  
拜使副受冊寶訖典儀曰再拜在位官皆再拜宣制  
曰太皇太后制命公等持節奉迎皇后宣訖典儀曰  
再拜使及副皆再拜受節典儀曰再拜在位群官皆  
再拜出殿門侍中奏禮畢皇帝陞座入自東房入閣  
侍中奏解嚴承旨放仗百僚再拜出皇帝常服還內  
冊寶出文德殿門端禮門入右昇龍門出宣德正門

赴行第冊后如納采儀使者曰某奉制授皇后備物  
典冊皇后受冊寶內外命婦序立如儀主人以書奉  
使者奉迎宰臣親王使相執政官文武百僚宗室等  
常服班迎於宣德門外行第儼者請使者曰某奉制  
以禮奉迎儼者入告主人曰臣某謹奉典制儼者出  
告入引主人出大門外再拜使者先入曰有制主人  
再拜使者宣制畢主人再拜主人受制訖主人答表  
再拜姆導皇后尚宮前引外堂出立房外典儀曰再

拜使副俱再拜使者曰令月吉日某等承制以禮奉  
迎內侍受以入使副退主人以書授使者奉於司言  
受以奏聞皇后降立堂下再拜訖升堂主人升阼階  
進西向戒之曰戒之戒之夙夜無違命訖主人退母  
進西階上東向施衿結帨戒之曰勉之戒之夙夜無  
違命訖連進皇后升輿至中門皇后降輿升車內皇  
后出大門使副及羣臣前引從皇后將到宣德門有  
司宰臣文武百僚宗室南向班迎再拜訖分班皇后

入宣德門鳴鐘鼓班迎官退皇后降車入次外輿出  
右昇龍門入端禮門文德殿東上閣門出文德殿後  
門入宣祐門至內東門內降輿司輿前導皇后詣福  
寧殿門大次以俟至日晡後皇后車入宣德門禮直  
官通事舍人引侍中版奏請中嚴內侍轉奏皇帝服  
通天冠絳紗袍御福寧殿宮人侍衛如常儀尚宮引  
皇后出次詣殿庭之東西南立尚儀跪奏外辦請皇  
帝降座禮迎尚宮前引詣庭中之西東面揖皇后以

入皇帝導皇后外自西階入室各就榻前立尚食跪  
奏具皇帝揖后皆坐尚食以饌進皇帝及后皆食三  
飯尚食以酒進皇帝皇后俱受爵飲尚食以饌進再  
飲如初三飲用盃如再飲尚儀跪奏禮畢皇帝皇后  
俱興尚宮請皇帝御常服常寢請皇后釋禮服入幄  
次日以禮朝見太皇太后皇太后參皇太妃如宮中  
之儀詔從之

昭德皇后劉氏初入宮為婕妤昭慈既廢立為皇后徽

宗立冊為元符皇后

朱夫人開封人治平間自襁褓入宮建炎四年從隆祐太后幸江西還封嘉國夫人主管大內公事知尚書內省提舉十閣分紹興二年卒

張夫人久在宮掖嘗教哲宗道君讀書建炎時卒

慕容貴妃哲宗後宮初為侍御紹興初累進至婕妤二十二年薨

靖康之難六宮皆北去惟隆祐太后以廢處瑤華及



先朝嬪御得留其姓氏封爵可見者如前

徽宗顯恭皇后王氏開封人徽宗元妃即位冊為皇后  
生欽宗大觀二年崩

顯肅皇后鄭氏開封人入宮累進至貴妃顯恭崩冊為  
皇后淵聖受禪尊為太上皇后

明達皇后劉氏入宮為才人七遷至貴妃政和三年薨  
追冊為皇后

明節皇后劉氏入宮為才人進至淑妃宣和三年薨追

冊為皇后

顯仁太后韋氏開封人入宮自侍御累遷至婉容生高宗從上皇北狩高宗即位遙尊為宣和皇后紹興十二年歸自金

貴妃王氏徽宗後宮政和七年薨

貴妃崔氏徽宗後宮宣和時坐罪廢

貴妃喬氏徽宗後宮從北狩歿於金

欽宗仁懷皇后朱氏開封人初為皇太子妃上受禪立

為皇后從北狩遂歿於金慶元三年遙上尊號謚祔於太廟欽宗室

高宗憲節皇后邢氏開封祥符人帝在康邸封夫人從二帝北狩帝即位遙冊為皇后紹興九年崩於五國城金祕之上虛中宮以待者十六年顯仁回始得凶問梓宮至祔神主於別廟淳熙末合祔高宗於太廟

憲聖慈烈太后吳氏開封人上在維揚納之累進婉儀憲節皇后崩間至紹興十三年立為皇后孝宗即位尊

為太上皇后

賢妃潘氏開封人高宗在康邸納之既即位生元懿太子進位賢妃紹興十八年薨

張賢妃開封人建炎初為才人進婕妤上令母養孝宗十二年薨

劉貴妃臨安人入宮累封至貴妃淳熙十四年薨

劉婉儀初為宜春郡夫人累遷至婉儀紹興末以罪廢張貴妃開封祥符人累封至婉容淳熙七年進封太上

皇帝淑妃再進貴妃紹熙元年薨

馮美人韓氏吳氏李氏王氏四才人紹興中俱寵幸後  
皆廢

容齋洪氏隨筆曰內庭婦職遷叙皆出中旨至中  
書命詞如尚書內省官固知其為長年習事如司  
字典字掌字知其為主守之微者至於紅紫霞帔  
郡國夫人則其年齡之長少爵列之崇卑無由可  
以測度紹興二十八年九月仲兄以左史直前奏

事時兼權中書舍人高宗聖訓云有一事待與卿

說昨有宮人宮正者封夫人乃宮中管事人六十

餘歲非是嬪御恐卿不知兄奏云係王剛中行詞

剛中除蜀帥係臣書黃容別撰入上額首後四日

經筵留身奏事奏言前日面蒙宣諭永嘉郡張夫

人告詞既得聖旨令不須別撰上曰乃皇后閣中

老管事人今六十六歲宮正乃執事者昨日宰執

奏欲換告亦無妨礙不須別進今已年老多病但

欲得稱呼耳蓋昨訓詞中稱其容色云

成穆皇后郭氏開封祥符人孝宗正妃初封咸寧郡夫人紹興二十六年薨上即位追冊為皇后

成恭皇后夏氏江西人上為普安郡王入宮上即位進賢妃踰年立為皇后乾道三年崩

成肅皇后謝氏丹陽人上為普安郡王時入宮上即位累遷至貴妃夏后崩中宮虛位將十載淳熙三年立為皇后光宗受禪尊為壽成皇后

蔡貴妃孝宗後宮淳熙十二年薨

李賢妃孝宗後宮淳熙十年薨

慈懿皇后李氏安陽人光宗元妃生寧宗帝正位東宮  
立為皇太子妃受禪立為皇后寧宗立稱太上皇后

黃貴妃張貴妃武才人並光宗後宮又有潘夫人符夫  
人二張夫人並上郡封無品程凡宮中之制郡夫人以  
上始稱房院

恭淑皇后韓氏其先相州人寧宗元妃上即位立為皇



后慶元六年崩

壽明皇后楊氏遂安人入宮累封貴妃恭淑既崩以嘉泰三年立為皇后理宗即位尊為皇太后

文獻通考卷二百五十六

欽定四庫全書薈要卷九千五百七十八

史部

文獻通考卷二百五十七

鄱陽馬端臨貴與著

帝系考八

皇太子皇子

策命

黃帝二十五子其得姓者十四人

索隱曰舊解破四為三言得姓十三人耳

今按國語胥臣云黃帝之子二十五宗其得姓者十四人為十二姓姬酉祁己滕歲任荀僖姑嫫依是也唯青陽與夷鼓同己姓又云青陽與蒼林為姬姓上則十四人為十二姓其文甚明唯姬姓再稱青陽蒼林蓋國語

文誤所以致令前儒共疑其姬姓青陽當為元囂是帝  
嚳祖本與黃帝同姬姓其國語上文青陽即是少皞金  
天氏為己姓者耳既理在

黃帝娶西陵之女生二子其

不疑無煩破四為三也  
後皆有天下其一曰元囂是為青陽青陽降居江水其

二曰昌意降居若水昌意娶蜀山氏女曰昌僕生高陽

高陽有聖德焉

注見后  
妃門

帝顓頊生子曰窮蟬

索隱曰系本作窮係也  
正義曰帝舜之高祖也

帝嚳娶陳鋒氏女生放勳娶姬訾氏女生摯帝嚳崩而

摯代立帝摯立不善崩

不善謂微  
弱不著

而弟放勳立是為帝

堯

堯子丹朱

舜子商均

夏禹子啓

按家天下自禹始啓而後凡襲位者非太子則王之衆子弟也其父子繼世以有天下者已見帝號歷年門茲不贅錄其支庶羣子名字之見於經傳者錄之其所不載則無由考焉

啓子太康昆弟五人其一為仲康餘名字不見

帝泄二子 帝不降 帝扃

殷湯三子 太丁 外丙 仲壬

太甲二子 沃丁 太庚

太庚三子 小甲 雍己 太戊

太戊二子 外壬 河亶甲

祖乙二子 祖辛 祖丁

祖丁四子 陽甲 盤庚 小辛 小乙

武丁二子 祖庚 祖甲

祖甲二子 廩辛 庚丁

帝乙二子 微子啓 帝辛

禮記國君世子生告於君接以太牢宰掌具  
接讀為捷捷勝也謂

食其母使補虛強氣也 三日卜士負之吉者宿齊朝服寢門外詩

負之射人以桑弧蓬矢六射天地四方  
詩之言承也桑弧蓬矢本太古

也天地四方男子所有事也 保受乃負之  
代士也保保母 宰醴負子賜之束

帛  
醴當為禮禮以一獻之禮酬之以幣也 卜士之妻大夫之妾使食子  
食子

不使君妾適妾有敵義不相褻以勞辱事也士妻大夫之妾謂時自有子正義曰王肅杜預並以爲接待夫人以太牢鄭必讀爲捷爲補虛強氣者以婦人初產必困病當三日之內未必能以禮相接應待負子之後今前爲之故知補虛強氣宜速也詩含神霧云詩者持也以手維持則奉承之義謂以手承下而抱負之桑蓬皆素質之物故知本太古也男子上事天下事地旁禦四方之難故云所有事然射禮唯四矢者謂天地非射事所及唯禦四方故止四矢蓬凡接子擇日雖三日之內尊是禦亂之草桑衆木之本

焉豕子則太牢

豕子世子也豕大也猶言長子

庶人特豚士特豕大夫

少牢國君世子太牢

皆謂長子

其非豕子則皆降一等

謂豕子之

弟及衆妾之子生也

天子諸侯

異爲孺子室於宮中

別掃



一室擇於諸母與可者必求其寬裕慈惠溫良恭敬慎

而寡言者使為子師其次為慈母其次為保母皆居子

室此人君養子之禮也諸母衆妾也可者傳御之屬也子師教示以善道者慈母知其嗜欲者保母安其居

處者士妻以乳食之而已矣他人無事不往為兒精氣微弱將驚動也三月之末

擇日剪髮為髻男角女羈否則男左女右髻所遺髮也夾句曰角午

達曰是日也妻以子見於父貴人則為衣服由命士以

下皆漱澣貴人大夫以上由自也男女夙興沐浴衣服具視朔食

朔食天子太牢諸侯少牢大夫特豕士特豚男女謂所生子之父母夫入門升自阼階立

於階西向妻抱子出自房當楣立東面

入門者入側室之門也大夫以

下見子就側室見妾於內寢避人君也

姆先相曰母某敢用時日祇見孺

子某妻姓若言姜氏也祇敬也

夫對曰欽有帥父執子之右手咳而

名之

欽敬帥循也言教之敬使有循也執右手明將授以事也

妻對曰記有成遂左

還授師

記猶識也識大之言使有成也師子師也

子師遍告諸父諸母名

後告

諸母若名

妻遂適寢

復夫之燕寢正義曰三月剪髮所留不剪者謂之髻夾腦兩旁當角

之處留髮不剪曰角午達者一縱一橫曰午今女剪髮留其頂上縱橫相交通達故曰午達不如兩角相對但

縱橫各一在頂上曰羈羈隻也

世子生則君沐浴朝服夫人亦如之皆

立於阼階西向世婦抱子升自西階

子升自西

階則人君見世子於路寢也見妾子就側室凡子生皆就側室正義曰世婦抱子從外而入其內寢是君之常居之處夫人不可以此寢生子故知亦在側室內也

適子庶子見於外寢撫其手

咳而名之禮帥初無辭也此適子謂世子弟也庶子妾子也外寢君燕寢也無辭辭謂欽

有成也

有帥記公庶子生就側室三月之末其母沐浴朝服見

於君擯者以其子見君所有賜君名之衆子則使有司

名之

擯者傳母之屬也人君尊雖妾不抱子有賜於君有恩惠也有司臣有事者也魯桓公名子問於申

也繻曾子問曰君薨而世子生如之何孔子曰卿大夫士

從攝主北面於西階南

變於朝夕哭位也攝主上卿代君聽政也

太祝裨冕

執束帛升自西階盡等不升堂命無哭

將有事宜清淨也裨冕者按神

則祭服也裨冕絺冕玄冕也士服爵弁服其太祝裨冕則大夫也

祝聲三告曰某之子

生敢告

聲噫歆驚神也某夫人氏

升奠幣於殯東几上哭降

几於殯東明繼

體也衆主人卿大夫士房中皆哭不踊

衆主人君之親也房中婦人也盡

一哀反位遂朝奠

反朝夕哭位

小宰升舉幣

所主也舉而下埋之階間三

日衆主人卿大夫士如初位北面

三日負子日也初告生時

太宰太

宗太祝皆裨冕少師奉子以縗祝先子從宰宗人從入

門哭者止

宰宗人詔贊君事者

子升自西階殯前北面祝立於殯

東南隅祝聲三曰某之子某從執事敢見子拜稽顙哭

奉子者

拜哭也祝宰宗人衆主人卿大夫士哭踊三者三

凡踊三跳

為一節三節為一踊謂之成踊故云三者三

降東反位皆袒子踊房中亦踊

三者三襲縗杖

踊襲縗杖成子禮也

奠出

亦謂朝奠

太宰命祝史以名

徧告於五祀山川

因負名之喪於禮畧

如已葬而世子生太宰太

宗從太祝而告於禰

告生

三月乃名於禰以名徧告及社

稷宗廟山川也

右古者生世子之禮此經所言雖皆諸侯之禮然戴記中所述喪禮祭禮多是諸侯之禮而未嘗不可通之天子也以是推之亦可見矣

經言接子冢子則太牢又

曰國君世子太牢註謂前冢子天子世子也

禮記凡三王教子必以禮樂樂所以修內也禮所以修外也禮樂交錯於中發形於外是故其成也懌恭敬而

溫文

中心中也懌懌懌

立太傅少傅以養之欲其知父子君臣

之道也

養猶教也言養者積浸成長之

太傅審父子君臣之道以示之

謂為之行其禮

少傅奉世子以觀太傅之德行而審喻之

為說其義

太傅在前少傅在後

謂其在學時

入則有保出則有師

謂燕居出

入時是以教喻而德成也

以有四人維持之

師也者教之以事而

喻諸德者也保也者慎其身以輔翼之而歸諸道者也

慎其身者謹安護之

記曰虞夏商周有師保有疑丞

記所云謂天子也取以成

說設四輔及三公不必備唯其人語使能也

語言也得能則用之

無則已

君子曰德成而教尊教尊而官正官正而國治此

之謂也

疏曰按四輔者尚書大傳云古者天子必有四隣前曰疑後曰丞左曰輔右曰弼天子有問無

以對責之疑可志而不志責之丞可正而不正責之輔可揚而不揚責之弼其爵視卿祿視次國之君

右古者教世子之禮歷代所建師傅本此其歷代師傅宮僚建置本末已見職官門茲不更錄其文王世子篇所言庠序釋奠養老乞言等事雖亦為教世子設然其本則學校也已見學校門此亦不詳著焉

漢文帝時賈誼上疏曰古之王者太子廼生固舉以禮也正始使士負之有司齊肅端冕見之南郊見於天



也過闕則下過廟則趨孝子之道也故自為赤子而

教固已行矣昔者成王幼在緇抱之中召公為太保

周公為太傅太公為太師保保其身體傅傅之德義

師道之教訓此三公之職也於是為置三少皆上大

夫也曰少保少傅少師是與太子宴者也

宴謂安居

故乃

孩提有識三公三少固明孝仁禮義以道習之逐去

邪人不使見惡行於是皆選天下之端士孝悌博聞

有道術者以衛翼之使與太子居處出入故太子迺

生而見正事聞正言行正道左右前後皆正人也及

太子少長知妃色則入於學學者所學之官也

官謂學舍

學禮曰帝入東學上親而貴仁則親疎有序而恩相  
及矣帝入南學上齒而貴信則長幼有差而民不誣  
矣帝入西學上賢而貴德則聖智在位而功不遺矣  
帝入北學上貴而尊爵則貴賤有等而下不隲矣

隲與

踰同謂越制

帝入太學承師問道退習而考於太傅太傅

罰其不則而匡其不及則德智長而治道得矣此五

學者既成於上則百姓黎民化輯於下矣及太子既

冠成人免於保傅之嚴則有記過之史

有過則記

徹膳之

宰

有闕則諫

進善之旌

進善言者立於旌下

誹謗之木

譏惡事者書之於木

敢

諫之鼓

欲顯諫者則擊鼓

瞽史誦詩工誦箴諫

工樂工也

大夫進

謀士傳民語習與智長故切而不媿

每被切磋故無太過可恥媿之

事

化與心成故中道若性三代之禮春朝朝日秋暮

夕月所以明有敬也

朝日夕月以朝暮皆迎其初出也

春秋入學坐

國老執醬而親餽所以明有孝也行以鸞和

鸞和車上鈴也

步中采齊

樂詩名也齊或作薺又作茨並才和反

趣中肆夏

亦樂詩名趣讀曰趨

趨疾步也凡此中者謂與其節相應也

所以明有度也其於禽獸見其

生不忍見其死聞其聲不忍食其肉故遠庖厨所以長恩且明有仁也夫三代所以久長者以其輔翼太子有此具也

右賈誼疏所言教養世子之法與戴記相出入故附於此

周文王之為世子朝於王季日三

三皆曰朝以其禮同鷄初鳴而

衣服至於寢門外問內豎之御者曰今日安否何如

內豎

小臣之屬掌外內之通命者御如今之小吏直日矣

內豎曰安文王乃喜

孝子恒兢兢

及日中又至亦如之及莫又至亦如之

莫夕也

其有不安

節則內豎以告文王文王色憂行不能正履

節謂履處故事履蹈

地也王季復膳然後亦復初食上必在視寒暖之節

在察也

食下問所膳

問所食也

命膳宰曰未有原應曰諾然後退

末猶

勿也原再也勿有所再進為其失飪臭味惡也退反其寢

武王帥而行之不敢有加

焉

庶幾程式文王有疾武王不說冠帶而養

言常在側

文王

一飯武王亦一飯文王再飯亦再飯

欲知氣味  
箴樂所勝

旬有二

日乃間

文王正妃太姒生武王武王同母兄弟十人其長子曰  
伯邑考次曰武王發次曰管叔鮮次曰周公旦次曰蔡  
叔度次曰曹叔振鐸次曰成叔武次曰霍叔處次曰康  
叔封次曰冉叔載

正義冉  
作丹

右史記世家所載如此左傳言管蔡郕霍魯衛毛  
聃邠雍曹滕畢原鄭郕文之昭也杜氏註十六國

皆文王子也然則史記世家所載十人蓋太姒正妃之子而邵雍滕畢原鄆郇七人則皆庶子歟七人皆受封惟畢與周召共佐成王功德最顯滕有國至戰國時傳世最久餘無聞焉

武王子 成王 邠 晉 應 韓

右文王武王之子其詳見於左傳故備錄之成王以後之王子除繼世以有天下者可考而餘無聞焉其經傳所及者亦畧載之於後 又按周以來

王子多為諸侯其受封傳世之本末分藩建國之  
規制已詳著於封建考更不再叙姑錄其名字耳  
漢以後諸侯王倣此

穆王二子 共王繫扈 孝王辟方

厲王二子 宣王靜 鄭桓公友

幽王二子 平王宜臼 伯服

桓王二子 莊王佗 王子克

莊王二子 釐王胡齊 王子頽



惠王二子 襄王鄭 甘昭公叔帶

頃王二子 匡王班 定王瑜

景王四子 太子聖 悼王猛 敬王丐 王子朝

貞王三子 哀王去疾 思王叔 考王嵬

考王二子 威烈王午 西周桓公揭

安王二子 烈王喜 顯王扁

秦孝文王子二十餘人

呂不韋說子楚曰子之兄弟二十餘人子居中不甚見幸久質

諸侯太子即位子不得為嗣矣

始皇子 長子扶蘇 公子十二人 公子將閭昆弟

三人 公子高 二世胡亥

按此據史記載二世既立趙高言沙丘之謀諸公子及太臣疑之諸公子皆帝兄怏怏不服當盡除之於是公子十二人僂死於市公子將閭昆弟三人囚於內宮議其罪使使賜死三人皆流涕拔劍自殺公子高欲奔恐收族乃上書請從死驪山二世許之以是觀之始皇之子見於傳記而可考者

十六人并扶蘇胡亥共十八人扶蘇以下十七人  
俱為胡亥所殺胡亥復為趙高所殺皆不得良死  
嗟乎威震四海功加五帝而身沒未幾子孫殲焉  
彼文昭武穆之苗裔分茅胙土與國咸休者數百  
年而未艾也仁而延暴而顛信哉

漢高皇帝八男呂后生孝惠帝曹夫人生齊悼惠王肥  
薄姬生孝文帝戚夫人生趙王如意趙姬生淮南厲王  
長諸姬生趙幽王友趙共王恢燕靈王建

高王傳

孝文皇帝四男竇皇后生景帝梁孝王武諸姬生代孝

王參梁懷王揖

文三  
王傳

孝景皇帝十四男王后生孝武皇帝栗姬生臨江閔王

榮河間獻王德臨江哀王閼程姬生魯共王餘江都易

王非膠西于王端賈夫人生趙敬肅王彭祖中山靖王

勝唐姬生長沙定王發王夫人生廣川惠王越膠東康

王寄清河哀王乘常山憲王舜

景十三  
王傳

孝武皇帝六男衛皇后生戾太子趙婕妤生孝昭帝王

夫人生齊懷王閔李姬生燕刺王旦廣陵厲王胥李夫

人生昌邑哀王髡

武五王傳

孝宣皇帝五男許皇后生孝元帝張婕妤生淮陽憲王

欽衛婕妤生楚孝王躡公孫婕妤生東平思王宇戎婕

妤生中山哀王竟

宣元六王傳

孝元皇帝三男王皇后生孝成皇帝傅昭儀生定陶共

王康馮昭儀生中山孝王興

宣元王傳

東漢光武十一子郭皇后生東海恭王强沛獻王輔濟

南安王康阜陵質王延中山簡王馬許美人生楚王英  
光烈皇后生顯宗東平憲王蒼廣陵思王荆臨淮懷公  
衡琅邪孝王京

明帝九子賈貴人生章帝陰貴人生梁節王暢餘七王  
千乘哀王建陳敬王羨彭城靖王恭樂成靖王黨下邳  
惠王衍淮陽頃王昺濟陰悼王長本書不載母氏

章帝八子宋貴人生清河孝王慶梁貴人生和帝申貴  
人生濟北惠王壽及河間孝王開餘四王千乘貞王伉

平春悼王全城陽懷王淑廣宗殤王萬歲不載母氏

和帝一子平原懷王勝

並列傳

後漢制拜皇太子儀百官會位定謁者引皇太子當  
御座殿下北面司空當太子西北東面立讀策書畢  
中常侍持太子璽綬太子再拜三稽首謁者贊曰皇  
太子臣某甲謁者稱制曰可三公升階上殿賀壽萬  
歲因赦天下

舊制太子食湯沐十縣周衛交戟五日一朝因坐東

廂省視膳食其非朝日使僕中允旦旦請問而已明  
不媒黷廣其敬也

魏武帝二十五男卞皇后生文皇帝任城威王彰陳思  
王植蕭懷王熊劉夫人生豐愍王昂哀殤王鑠環夫人  
生鄧哀王冲彭城王據燕王宇杜夫人生沛穆王林中  
山恭王哀秦夫人生濟陽懷王琰陳留恭王竣尹夫人  
生范陽閔王矩王昭儀生趙王揮孫姬生臨邑殤公子  
上楚王彪剛殤公子勤李姬生穀城殤公子乘郤戴公



子整靈殤公子京周姬生楚安公均劉姬生廣宗殤公  
子棘宋姬生東平靈王徽趙姬生樂陵王茂

文帝九男甄皇后生明帝李貴人生贊哀王協潘淑媛  
生北海悼王蕤朱淑媛生東武陽懷王鑒仇昭儀生東  
海定王霖徐姬生元城哀王禮蘇姬生邯鄲懷王邕張  
姬生清河悼王貢宋姬生廣平哀王儼

晉宣帝九男穆張皇后生景帝文帝平原王幹伏夫人  
生汝南文成王亮瑯邪武王伷

音宙

清惠亭侯京扶風武

王駿張夫人生梁王彤

音融

栢夫人生趙王倫

文帝九男文明王皇后生武帝齊獻王攸城陽哀王邕  
遼東悼惠王定國廣漢殤王廣德其樂安平王璽燕王  
機皇子永祚樂平王延祚不知母氏

武帝二十六男楊元后生毘陵悼王軌惠帝秦獻王東  
審美人生城陽懷王景楚隱王瑋長河厲王義徐才人  
生城陽殤王憲匱才人生東海冲王祗趙才人生始平  
哀王裕趙美人生代哀王演李夫人生淮南忠壯王允

吳孝王晏嚴保林生新都懷王該陳美人生清河康王  
遐諸姬生汝陰哀王謨程才人生成都王頴王才人生  
孝懷帝楊悼后生渤海殤王恢餘八子不顯母氏並早  
夭又無封國及追謚

元帝六男宮人荀氏生明帝及瑯邪孝王哀石健仔生  
東海哀王冲王才人生武陵威王晞鄭夫人生瑯邪悼  
王煥及簡文帝

明帝二男庾皇后生成帝康帝

成帝二男太妃周氏生哀帝海西公

簡文帝七男王皇后生會稽思世子道生皇子俞生胡  
淑儀生臨川王郁皇子朱生王淑儀生皇子天流李夫  
人生孝武帝會稽孝王道子俞生朱生天流並早夭  
孝武帝二子安帝恭帝不知母氏

晉制皇帝會公卿座位定太子後至孫毓以為羣臣  
不應起禮曰父在斯為子君在斯為臣侍坐於所尊  
見同等不起皆以為尊無二上故有所厭之義也昔

衛綰不應漢景之召釋之正公門之法明太子事同  
於羣臣羣臣亦統一於所事應依同等不起之禮明  
帝太寧三年詔曰漢魏以來尊崇儲貳使官屬稱臣  
朝臣咸拜此甚無謂今太子衍幼冲之年使臣先達  
將今所習見謂之自然此豈可以教之邪令内外通  
議尚書令卞壺議以為春秋王太子不會明禮同於  
君皆所以重儲貳異正嫡苟奉之如君不得不拜矣  
太子若存謙冲故宜答拜臣以為皇太子之立郊告

天地正位儲宮豈得同之皇子揖讓而已謂宜稽則

漢魏闔朝同拜從之

徐邈云東宮臣上表天朝既用黃紙上太子疏則用白紙也北

人有作符闔宮屬者云東宮臣上疏於太子用白紙太子答之用黃紙朝士率常牋上下死罪太子答之用白亦有惶恐此自得中朝舊法

東晉孝武皇帝泰元十二年臺符問皇太子既拜朝臣奉賀應上禮不國子博士車允云百辟卿士咸與盛禮展敬拜伏不須復上禮唯方伯牧守不覩大禮自非酒牢貢羞無以裁其乃誠故宜有上禮亦如元

正大慶方伯莫不上禮朝臣奉璧而已太學博士庾  
弘之議按武帝咸寧中諸王新拜有司近臣諸王公  
主上禮今皇太子國之儲副既以崇建普天同慶謂  
應上禮奉賀按漢魏故事皇太子稱臣新禮以太子  
既以子為名而又稱臣臣子兼稱於義不通除太子  
稱臣之制摯虞以為孝經資於事父以事君兼臣子  
則不嫌稱臣宜定新禮皇太子稱臣如舊詔從之

尚書

符又問王公以下見皇太子儀及所制衣服車允議  
朝臣宜朱衣講幘拜敬太子答拜按經傳不見其文

故太傅羊祜牋慶太子稱叩頭此則拜之証又太寧三年詔議其典尚書卞壺謂宜稱則漢魏闔朝同拜其朱衣冠冕唯施天朝宜構幘而已

宋武帝七男張夫人生少帝孫脩華生廬陵孝獻王義真胡捷仔生文帝王脩容生彭城王義康桓美人生江夏文獻王義恭孫美人生南郡王義宣呂美人生衡陽文王義季

文帝十九男元皇后生元凶劼潘淑妃生始興王濬路淑媛生孝武帝吳淑儀生南平穆王鏐高脩儀生廬陵



昭王紹殷脩華生竟陵王誕曹倓仔生建平宣簡王宏  
陳脩容生東海王禕謝容華生晉熙王昶江脩容生武  
昌王渾沈倓仔生明帝楊美人生始安王休仁邢美人  
生山陽王休祐蔡美人生海陵王休茂董美人生鄱陽  
哀王休業顏美人生臨慶冲王休倩陳美人生新野懷  
王夷父荀美人生桂陽王休範羅美人生巴陵哀王休  
若紹出繼廬陵孝獻王義真

孝武帝二十八男文穆皇后生廢帝子業豫章王子尚

陳淑媛生晉安王子勛阮容華生安陸王子綏徐昭容

生皇子子深何淑儀生松滋侯子房史昭華生臨海王

子頊殷貴妃生始平孝敬王子鸞次永嘉王子仁與皇

子子深同生何婕妤生皇子子鳳謝昭容生始安王子

真江婕妤生皇子子元史昭儀生邵陵王子元次齊敬

王子羽與始平孝敬王子鸞同生江美人生皇子子衡

楊婕妤生淮南王子孟次皇子子況與皇子子元同生

次南平王子產與永嘉王子仁同生次晉陵孝王子雲

次皇子子文並與始平孝敬王子鸞同生次廬陵王子  
興與淮南王子孟同生次南海哀王子師與始平孝敬  
王子鸞同生次淮南思王子霄與皇子子元同生次皇  
子子雍與始安王子真同生次皇子子趨與皇子子鳳  
同生次皇子子期與皇子子衡同生次東平王子嗣與  
始安王子真同生張容華生皇子子悅安陸王子綏南  
平王子產廬陵王子與並出繼皇子子深子鳳子元子  
衡子況子文子悅未封早天子趨子期子悅未封為明

帝所殺

明帝十二男陳貴妃生後廢帝謝脩儀生皇子法良陳  
昭華生順帝徐婕妤生第四皇子鄭脩容生皇子智并  
次晉熙王燮與皇子法良同生泉美人生邵陵殤王友  
次江夏王躋與第四皇子同生徐良人生武陵王贊杜  
脩華生隨陽王翽次新興王嵩與武陵王贊同生又泉  
美人生始建王禧智并燮躋贊並出繼法良未封第四  
皇子未有名早夭

齊高帝十九男昭皇后生武帝豫章文獻王嶷謝貴嬪  
生臨川獻王映長沙威王晃羅太妃生武陵昭王晔任  
太妃生安成恭王暕陸脩儀生鄱陽王鏘晉熙王鉉袁  
脩容生桂陽王鐔何太妃生始興簡王鑑宜都王銓區  
貴人生衡陽王鈞張淑妃生江夏王鋒河東王鉉李美  
人生南平王銳第九第十三第十四第十七皇子早亡  
衡陽王鈞出繼帝兄元王後

武帝二十三男穆皇后生文惠太子竟陵文宣王子良

張淑妃生廬陵王子卿魚腹侯子響周淑儀生安陵王  
子敬建安王子真阮淑媛生晉安王子懋衡陽王子峻  
王淑儀生隨郡王子隆蔡健仔生西陽王子明樂容華  
生南海王子罕傅克華生巴陵王子倫謝昭儀生邵陵  
王子貞江淑儀生臨賀王子岳庾昭容生西陽王子文  
荀昭華生南康王子琳顏健仔生永陽王子珉宮人謝  
生湘東王子建何克華生南郡王子夏第六第十二第  
十五第二十二皇子早亡子珉繼衡陽元王後

明帝十一男敬皇后生廢帝東昏侯寶卷江夏王寶元  
鄱陽王寶寅和帝殷貴嬪生巴陵隱王寶義晉熙王寶  
嵩袁貴妃生廬陵王寶源管淑妃生邵陵王寶修許淑  
媛生桂陽王寶貞餘皆早夭

梁武帝八男丁貴嬪生昭明太子統簡文皇帝廬陵威  
王續阮脩容生孝元帝吳淑媛生豫章王綜董昭儀生  
南康簡王績丁充華生邵陵攜王綸葛脩容生武陵王  
紀

簡文帝二十子王皇后生哀太子大噐南郡王大連陳  
淑容生潯陽王大心左夫人生南海王大臨安陸王大  
春謝夫人生瀏陽公大雅張夫人生新興王大莊包昭  
華生西陽王大鈞范夫人生武寧王大盛褚脩華生建  
平王大球陳夫人生義安王大昕朱夫人生綏建王大  
摯其臨川王大穎桂陽王大成汝南王大封樂良王大  
圜並不知母氏潘美人生皇子大訓早亡

元帝諸子徐妃生忠烈世子方等王貴嬪生貞惠世子



方諸始安王方略袁貴人生愍懷太子方矩夏貴妃生  
敬皇帝餘不顯

陳文帝十三男沈皇后生廢帝始興王伯茂嚴淑媛生  
鄱陽王伯山晉安王伯恭潘容華生新安王伯固劉昭  
華生衡陽王伯信王充華生廬陵王伯仁張容華生江  
夏王伯義韓脩華生武陵王伯禮江貴妃生永陽王伯  
智孔貴妃生桂陽王伯謀二男早卒無名伯信出繼衡  
陽王昌

宣帝四十二男柳皇后生後主彭貴人生始興王叔陵  
曹淑華生豫章王叔英何淑儀生長沙王叔堅宜都王  
叔明魏昭華生建安王叔卿錢貴妃生河東王叔獻劉  
昭儀生新蔡王叔齊袁昭容生晉熙王叔文義陽王叔  
達新會王叔坦王姬生淮南王叔彪巴山王叔雄吳姬  
生始興王叔重徐姬生潯陽王叔儼淳于姬生岳陽王  
叔慎王脩華生武昌王叔虞韋脩容生湘東王叔平施  
姬生臨賀王叔敖沅陵王叔興曾姬生陽山王叔宣楊

姬生西陽王叔穆申便行生海陵王叔儉南郡王叔澄  
岳山王叔韶太原王叔匡袁姬生新興王叔純吳姬生  
巴東王叔謨劉姬生臨海王叔顯秦姬生新寧王叔隆  
新昌王叔榮其皇子叔叡叔忠叔泓叔毅叔訓叔武叔  
處叔封八人並未及封三子早卒無名

後主二十二男張貴妃生太子深會稽王莊孫姬生吳  
興王允高昭儀生南平王嶷呂淑媛生永嘉王彥邵陵  
王兢龔貴嬪生南海王虔錢塘王恬張淑華生信義王

祇徐淑儀生東陽王恮孔貴人生吳郡王藩其皇子總  
觀明綱統充洽綽威辯十一人並未及封

後魏道武皇帝十男宣穆劉后生明元帝賀夫人生清  
河王紹大王夫人生陽平王熙王夫人生河南王曜河  
間王修長樂王處文二王母氏闕段夫人生廣平王連  
京兆王黎皇子渾及聰母氏並闕皆早薨無傳

明元皇帝七男杜密皇后生太武大慕容夫人生樂平  
戾王丕安定殤王彌闕母氏慕容夫人生樂安宣王範

尹夫人生永昌莊王健建寧王崇新興王俊二王並闕母氏

太武帝十一男賀皇后生景穆帝越椒房生晉王伏羅舒椒房生東平王翰弗椒房生臨淮王譚伏椒房生廣陽王建閭石昭儀生吳王余其小兒猫兒真彪頭龍頭並闕母氏早薨無傳

景穆帝十四男恭皇后生文成皇帝袁椒房生陽平幽王新成尉椒房生京兆康王子推濟陰王小新成楊椒

房生汝陰靈王天賜樂良厲王萬壽廣平殤王洛侯母  
並闕孟椒房生任城康王雲劉椒房生南安惠王禎城  
陽康王長壽慕容椒房生章武敬王太洛尉椒房生樂  
陵康王胡仁孟椒房生安定靖王休趙王深早薨無傳  
母闕

文成皇帝七男孝元皇后生獻文皇帝李夫人生安樂  
厲王長樂曹夫人生廣川莊王略沮渠夫人生齊郡順  
王簡乙夫人生河間孝王若悅夫人生安豐匡王猛元

夫人生韓哀王安平早薨無傳

獻文皇帝七男思皇后生孝文皇帝封昭儀生成陽王  
禧韓貴人生趙郡靈王幹高陽文穆王雍孟椒房生廣  
陵慧王羽潘貴人生彭城宣王勰高椒房生北海王詳  
孝文皇帝七男林廢后生廢太子恂文昭皇后生宣武  
帝廣平文穆王懷袁貴人生京兆王愉羅夫人生清河  
文獻王懌汝南文宣王悅鄭充華生皇子桃未封早夭  
齊神武帝十五男武明婁皇后生文襄皇帝文宣皇帝

孝昭皇帝襄城景王清武成皇帝博陵文簡王濟王氏  
生永安簡平王浚穆氏生平陽靖翼王淹大爾朱氏生  
彭城景思王浹華山王凝韓氏生上黨剛肅王渙小爾  
朱氏生任城王潛游氏生高陽康穆王湜鄭氏生馮翊  
王潤馬氏生漢陽敬懷王洽

文襄六男文敬元皇后生河間王孝琬宋氏生河南王  
孝瑜王氏生廣寧王孝珩蘭陵王長恭不傳母氏陳氏  
生安德王延宗燕氏生漁陽王紹信



文宣五男李后生廢帝及太原王紹德馮世婦生范陽王紹義裴嬪生西河王紹仁顏嬪生隴西王紹廉

孝昭七男元皇后生樂陵王百年桑氏生襄城王亮諸姬生汝南王彥理始平王彥德城陽王彥基定陽王彥康汝陽王彥忠

武成十三男胡皇后生後主及瑯邪王儼李夫人生南陽王綽後宮生齊安王廓北平王貞高平王仁英淮南王仁光西河王仁機樂平王仁邕潁川王仁儉安樂王

仁雅丹陽王仁直東海王仁謙

後主五男穆皇后生幼主諸姬生東平王恪次善得次  
買德次資錢

北齊冊皇太子皇帝臨軒司徒為使司空副之太子  
服遠遊冠入至位使者入奉冊讀訖皇太子跪受冊  
於使者以授中庶子又受璽綬於尚書以授庶子稽  
首以出就冊使者持節至東宮宮臣內外官定列皇  
太子階東西面若幼則太師抱之主衣二人奉空頂

幘服從以授冊明日拜章表於東宮殿庭中庶子中舍人乘輅車奏章詣闕堂謝擇日齋於崇正殿服冕乘安車謁廟擇日羣臣上禮又擇日會明日三品以上賤賀

天保元年皇太子監國在西林園冬會羣臣議皆東面二年於北城第內冬會又議東面吏部郎陸印疑非禮魏收改為西面邢子才議欲倣前曰凡禮有同者不可令異詩說天子至於大夫皆乘四馬况以方

面之少何可皆不同乎若太子定西面者王公卿大夫士復何面也南面人君正位今一官之長無不南面太子聽政亦南面坐議者引晉舊事太子在東宮西面為避尊位非為嚮臺殿也子才以為東晉博儀依漢魏之舊太子普臣四海不以為嫌何疑於東面禮嗣子絕旁親嗣子冠於阼冢子生接以太牢漢元著令太子絕馳道此皆禮同於君又晉王公嗣攝命臨國乘七旒安車駕用三馬禮同三公近宋太子乘

象輅皆有同處不以為嫌况東面者君臣通禮獨何為避明為嚮臺所以然也近皇太子在西林園於殿猶且東面於北城非宮殿之處更不得邪諸人以東面為尊宴會須避按燕禮燕義君位在東賓位在西君位在阼階故有武王踐阼不在西也禮乘君之車不敢曠左君在惡室其位左亦在東不在西也君在阼夫人在房鄭注人君尊東也前代及今皇帝宴會接客亦東堂西面若以東面為貴皇太子以儲貳之

禮監國之重別第宴臣賓自得申其正位禮者皆東  
宮臣屬公卿預宴觀禮而已若以西面為卑實是君  
之正位太公不肯北面說丹書西面則道之西面乃  
尊也君位南面有東有西何可皆避且事之少異有  
可相比者周公臣也太子子也周公為冢宰太子為  
儲貳明堂尊於別第朝諸侯重於宴臣賓南面貴於  
東面臣踈於子冢宰輕於儲貳周公攝政得在明堂  
南面朝諸侯今太子監國不得於別第宮東面宴客

情所未安且君行以太子監國君宴不以公卿為賓  
明父子無嫌君臣有嫌按儀注王受詔冠婚皇子皇  
女皆東面今不約王公南面獨約太子何所取邪議  
者南尊改就西面轉居尊位更非合禮方面既少難  
為節文東西二面君臣通用太子宜然於禮為允

周文帝十三子姚夫人生明帝後宮生宋獻公震文元  
皇后生孝閔皇帝文宣叱奴皇后生武帝衛刺王直達  
步妃生齊煬王憲王姬生趙僭王招後宮生譙孝王儉

陳惑王純越野王盛代罌王達莫康公通滕聞王道

孝閔帝一子陸夫人生紀厲王康

武帝七男李皇后生宣帝漢王贊庫汗姬生秦王贄曹

王允馮姬生道王充薛世婦生蔡王允鄭姬生荆王元

宣帝三子朱皇后生靜帝王姬生萊王衍皇甫姬生郢

王術

隋文帝五男皆文獻后獨孤氏所生長房陵王勇次煬

帝次秦孝王俊次庶人秀次庶人諒



文帝立勇為皇太子軍國政事及尚書死罪以下皆  
令勇參決後經冬至百官朝勇勇張樂受賀帝問朝  
臣近聞至節內外百官相率朝東宮是何禮也太常  
少卿辛亶對曰於東宮是賀不得言朝帝曰改節稱  
賀正可三數十人逐情各去何因有司徵召一時普  
集太子法服設樂以待之東宮如此殊乖禮制乃下  
詔曰皇太子雖居上嗣義兼臣子而諸方岳牧正冬  
朝賀任土作貢別上東宮事非典則宜悉停斷

煬帝三男蕭皇后生元德太子昭齊王暕蕭嬪生趙王  
杲

唐高祖二十二子竇皇后生隱太子建成太宗皇帝衛  
懷王元霸巢刺王元吉萬貴妃生楚王智雲莫嬪生荆  
王元景孫嬪生漢王元昌尹德妃生豐王元亨張氏生  
周王元方郭婕妤生徐王元禮宇文昭儀生韓王元嘉  
魯王靈夔王才人生彭王元則張寶林生鄭王元懿張  
美人生霍王元軌楊美人生虢王鳳劉婕妤生道王元

慶崔嬪生舒王元名楊嬪生江王元祥魯才人生密王  
元曉柳寶林生滕王元嬰

太宗十四子文德皇后生常山愍王承乾漢王泰高宗  
皇帝後宮生楚王寬楊妃生吳王恪蜀王愔陰妃生齊  
王祐王氏生蔣王暉燕妃生楚王貞江王囂韋妃生紀  
王慎後宮生代王簡楊妃生趙王福楊氏生曹王明

高宗八子後宮劉氏生燕王忠鄭氏生原悼王孝楊氏  
生澤王金蕭淑妃生許王素節武后生孝敬皇帝弘章

懷太子賢中宗睿宗

中宗四子韋庶人生懿德太子重潤後宮生譙王重福  
節愍太子重俊殤帝

睿宗六子肅明皇后生讓皇帝憲宮人柳氏生惠莊太  
子撝昭成皇后生玄宗崔孺人生惠文太子範王德妃  
生惠宣太子業後宮生隋王隆悌

玄宗三十子劉華妃生奉天皇帝琮靖恭太子琬儀王  
璿趙麗妃生太子瑛元獻皇后生肅宗錢妃生棣王琬

皇甫德儀生鄂王瑤劉才人生光王琚武惠妃生懷思  
王敏及壽王瑁盛宣王琦高婕妤生汴哀王璿郭順儀  
生永王璘柳婕妤生延王玢鍾美人生濟王環盧美人  
生信王瑄閻才人生義王玘王美人生陳王珪陳才人  
生豐王珙鄭才人生恒王瑒武賢儀生涼王璿汴哀王  
璿餘七子夭母氏失傳

肅宗十四子章敬皇后生代宗宮人孫氏生越王保張  
氏生承天皇帝倓王氏生衛王伋陳婕妤生彭王僅韋

妃生兗王儻張美人生涇王佖後宮生鄆王榮裴昭儀  
生襄王儼段使仔生杞王倓崔妃生召王僊張皇后生  
恭懿太子侶定王侗後宮生僖

代宗二十子睿真皇后生德宗崔妃生昭靖太子邈貞  
懿皇后生韓王迥其均王遐睦王述丹王逾恩王連簡  
王邁益王廼隋王迅荆王選蜀王邈忻王造韶王暹嘉  
王運端王遇循王適恭王通原王逵雅王逸凡十七王  
史亡其母之氏位

德宗十一子昭德皇后生順宗帝取昭靖太子子舒王  
誼為第二子又取順宗子文敬太子諤為第六子餘通  
王諶虔王諒肅王祥資王謙代王諲昭王誠欽王諤珍  
王誠八王史亡其母之氏位

順宗二十七子莊憲皇后生憲宗及福王綰張昭訓生  
郊王經趙昭儀生宋王結王昭儀生郇王總邵王約岳  
王緄其淑王縱莒王紆密王稠積王緄冀王綰和王綺  
衡王絢珍王繕撫王紘桂王綸袁王紳翼王綽蘄王緝

欽王績凡二十王史亡其母之氏位

憲宗二十子紀美人生惠昭太子寧懿安皇后生穆宗  
孝明皇后生宣宗後宮生灋王惲深王棕絳王悟建王  
恪鄜王憬瓊王悅沔王恂嫫王懌茂王惜緇王協衡王  
憺澶王悅棣王惴彭王惕信王惲榮王憤凡十七王史  
失其母之氏號

穆宗五子恭僖皇后生敬宗貞獻皇后生文宗宣懿皇  
后生武宗後宮生懷懿太子湊安王溶史失其母之號



氏

敬宗五子郭妃生悼懷太子普後宮生陳王成美梁王  
休復襄王執中紀王言揚史失其母之號氏

文宗二子王德妃生莊恪太子永後宮生蔣王宗儉

武宗五子杞王峻益王峴兗王岐德王懌昌王嵯史並  
失其母之氏位

宣宗十一子昭太后生懿宗後宮生靖懷太子漢通王  
滋慶王沂濮王澤鄂王潤懷王洽昭王訥康王汶廣王

瀛衛王灌史失其母之氏位

懿宗八子惠安皇后生僖宗恭憲皇后生昭宗後宮生  
魏王侑涼王旼蜀王倓威王侶吉王保恭哀太子倚史  
失其母之氏位

僖宗二子建王震益王陞史失其母之氏位

昭宗十七子積善皇后生德王裕及哀帝後宮生棣王  
昶虔王禕沂王禔遂王禕景王秘祁王祺雅王禎瓊王  
祥端王禎豐王祁和王福登王禧嘉王祐頴王禔蔡王

祐史失其母之氏位

梁太祖八子末帝柳王友裕博王友文郢王友珪福王友璋賀王友雍建王友徽康王友孜史不言其母氏

後唐莊宗五子劉后生魏王繼岌繼潼繼嵩繼蟾繼曉史不言其母氏

明宗六子昭懿皇后夏氏生秦王從榮愍帝宣憲皇后魏氏生潞王從珂淑妃王氏生許王從益從景從璨史不言其母氏

廢帝二子重吉重美史不言其母氏

晉高祖七子李皇后生楚王重信號王重英壽王重義  
郢王重允夔王重進陳王重杲重睿史不言其母氏  
少帝二子延煦延寶史不言其母氏

漢高祖三子魏王承訓隱帝陳王承勲史皆不言其母  
氏

周太祖三子養子世宗郟王侗杞王信史皆不言其母  
氏

世宗五子越王宗誼恭帝曹王宗讓紀王熙謹蘄王熙  
誨史不言其母氏

宋太祖皇帝四子賀皇后生留哥魏王德昭顯哥王皇  
后生岐王德芳

太宗九子李皇后生楚王元裕及真宗其昭成太子元  
僖陳王元份安王元傑密王元偓曹王元偁鎮王元儼  
代國公元億史不詳其母氏

至道元年詔立皇太子令有司草具冊禮以翰林學

士承旨宋白為冊皇太子禮儀使有司言按前代無  
太子執圭之文按周禮公儀執桓圭公即三恪之後  
乃上公也晉制太子出會在三恪之下三公之上請  
如王公之制執桓圭餘如舊制從之九月丁卯太宗  
御朝元殿陳如元會之儀皇太子自東宮常服乘馬  
赴朝元門外幄次改服遠遊冠朱明衣三師三少導  
從入殿門受冊寶太尉率百官奉賀皇太子易服乘  
馬還宮百官朝服詣宮參賀樞密使內職諸王宗室

師保賓客宮臣等畢集皆序班於宮門之外庶子版  
奏外備內臣褰簾皇太子常服出次就座諸王宗室  
參賀再拜訖垂簾皇太子降座還次中書門下文武  
百官樞密使內職師賓客而下以次參賀皆降階答  
拜訖升座受文武宮臣三品以下參賀庚午具鹵簿  
謁太廟五室常服乘馬出東華門升輅先是有司言  
唐禮宮臣參賀皇太子皆舞蹈開元始罷其禮故事  
百官及東宮官接見祇呼皇太子上牋啟稱皇太子

殿下百官自稱名宮官自稱臣常所行用左春坊印  
宮內行令又按唐制凡東宮處分論事之書皇太子  
並書諾今左右庶子以下署姓名宣奉行書其與親  
友師傅等書不用此制今請如開元之制宮臣止稱  
名不行舞蹈之禮伏緣皇太子無判開封府其所上  
表狀即署皇太子之位其當申中書樞密院狀祇判  
官署餘斷按及處分公事並書諾詔為准餘皆從之  
又言百官見皇太子自兩省五品尚書省御史臺四



品諸司三品以上皆答拜餘悉受拜宮臣自左右庶  
子以下悉用參見之儀其皇太子宴會位在王公之  
上奏可有司草具皇太子受冊畢朝皇后儀詔止用  
宮中常禮十月皇太子言臣自受冊以來逮茲累日  
每見僚屬率皆稱臣況至尊無二上之文事主有比  
肩之義在臣之懇實所不遑望許仍舊名許之真宗  
天禧二年八月丁卯冊為皇太子並如至道之儀冊  
用珉玉如乘輿之制而差損降其押輿用金塗銀平

釵承以髹漆小案飾以衣繡凡飾用龍者皆以螭鳳  
天禧四年閏十二月左僕射兼太子少師平章事丁  
謂言臣與無少保賓客至資善堂許皇太子不答拜  
詔不允

真宗六子郭皇后生周王元祐章懿李皇后生仁宗四  
子早亡史不詳其母氏

仁宗三子俞才人生褒王昉苗昭儀生豫王昕朱才人  
生鄂王曦皆早亡英宗以濮安懿王之子立為皇子入

繼大統

英宗四子長神宗次吳王顥潤王顥益王顥皆宣仁高  
皇后所生

神宗十四子欽成朱皇后生哲宗楚榮憲王似欽慈陳  
皇后生徽宗宋夫人生成王侑邢賢妃生惠王僅冀冲  
孝王僖徐冲惠王僖宋健仔生唐哀獻王俊向夫人生  
褒王伸邢婉儀生豫悼惠王价武賢妃生吳榮穆王似  
郭夫人生儀王偉林賢妃生燕王侯越王偁

徽宗二十一子顯恭王皇后生欽宗顯仁韋皇后生高  
宗明達劉皇后生濟陽郡王棧祁王模信王榛明節劉  
皇后生建安郡王模嘉國公倚英國公棣諸姬生兗冲  
僖王禪鄆王楷荆悼敏王楫肅王樞景王杞齊王栩邠  
冲穆王材莘王植華原郡王樸徐王棣沂王桺鄆冲懿  
王拱和王棣漢冲昭王椿安康郡王握廣平郡王健陳  
悼惠王機相國公棣瀛國公棣溫國公棟儀國公桐昌  
國公柄潤國公樅

欽宗二子仁懷朱皇后生太子諶少子訓北地所生終於五國城

高宗一子潘賢妃生元懿太子粦早亡孝宗以秀安僖王之子立為皇太子入繼大統

孝宗四子莊文太子愔魏惠獻王愷光宗邵悼肅王恪皆成穆郭皇后所生

初紹興崇建皇儲詔有司備禮冊命然在欽宗恤制未及製樂乾道初元詔啓震宮命禮部太常寺討舊

典以聞受冊日陳黃麾仗於大慶殿設宮架樂於殿  
庭皇帝陞降御座作乾安之樂升用黃鍾宮降用蕤  
賓宮皇太子入殿門作明安之樂受冊出殿門亦如  
之皆用應鍾宮至七年易應鍾而奏以姑洗古者太  
子生則太師吹管以度其聲觀所協之律有虞典樂  
教胄子自天子至元子皆以樂為教所以養其情性  
之正蕩滌邪氛消融查滓而和順於道德則陳金石  
雅奏以重元良冊拜宜倣古誼式昭盛禮繇唐季世

儲貳罕定國家亦多故而禮廢樂缺皇朝建隆定樂  
雖詔皇太子出入奏良安至道始冊皇太子有司言  
太子受冊宜奏正安之樂舉行百年曠典中外胥悅  
至天禧冊命禮儀院復奏改正安為明安之樂乾道  
之用明安實祖述天禧而姑洗為宮則唐東宮軒垂  
奏樂舊貫云

光宗二子節使挺及寧宗皆慈懿李皇后所生

寧宗九子長子未名而夭莫詳母氏恭淑韓皇后生究

王浚邠王坦郢王增華王洞鍾夫人生順王圻申王塢  
其肅王埶郢王坻史不言其母氏九王俱早夭景獻太  
子詢以燕懿王後立為太子薨於東宮理宗以沂靖惠  
王後立為皇太子入繼大統

文獻通考卷二百五十七





總校官庶吉士臣張能照

校對官檢討臣王坦修

謄錄監生臣程華